

समे – 12:25

<><><><><>

Amit Shah Guwahati

गृहमंत्री अमित शाह होर अज्ज असम च केई विकास योजनाएं दा शुभारंभ करडन। ओह भलेआं अज्जै-कल्लै दिएं स्हूलतें कन्नै लैस 'लचित बारफूकन' पुलस अकैडमी दा उद्घाटन करडन ते पुलस अकैडमी दी रिहायशी परियोजना दा नीह पत्थर बी रक्खडन। इस मौके पर असम दे मुख्यमंत्री हिमंता बिस्वा सरमा ते केंद्री जल मार्ग मंत्री सर्बानन्द सोनोवाल बी मजूद रौहडन। श्री शाह होर कल संज्ञां असम च गोलाघाट पुज्जे हे। गृहमंत्री होर अज्ज दपैहरी मिजोरम जाडन ते असम राईफल्स बेस गी आइजोल थमां जोखावसांग मुंतकिल करने दे कार्यक्रमै च शामिल होडन। श्री शाह होर कल कोकराझार जिले च दोत्ताम च अखिल भारती विद्यार्थी संघ दे सलाना समारोह गी संबोधित करडन ते मगरा पूर्वोत्तर दे 8 मुख्यमंत्रियें कन्नै गुवाहाटी च पूर्वोत्तर च नमें अपराधिक कनून लागू कीते जाने दी समीक्षा करडन।

<><><><><>

UN-Pak Remarks

संयुक्त राष्ट्र च भारत दे स्थाई प्रतिनिधि पर्वतनैनी हरीष होरें जम्मू कश्मीर बारे पाकिस्तान दी गैर जरूरी ते बेमतलब टिप्पणी दी सख्ती नै नुख्ताचीनी करदे होई इसी सिरे थमां खारज करी दित्ता ऐ। संयुक्त राष्ट्र च बोलदे होई उनें आखेआ जे पाकिस्तान आस्सेआ बार बार खामखाह दे दावे करने नै ना ते ओहदी स्थिति मान्य होई सकदी ऐ ते नां गै बन्ने पारा ओहदे आस्सेआ चलाए जा'रदे आतंकवाद गी जायज ठैहराया जाई सकदा ऐ। उनें जोर देइयै आखेआ जे जम्मू कश्मीर भारत दा अनट्रुट हिस्सा हा, ऐ ते म्हेशां बने दा रौहग। हरिष होरें पाकिस्तान च धार्मिक समुदाएं पर जुल्म ते हिंसा च उपरोतली होआ'रदे बाद्धे गी बी उजागर कीता ते धार्मिक बरोबरी लेई कुलसंसारी वचनबद्धता दा आह्वान कीता। उनें दुनिया दे देशें अग्गे अपील कीती जे ओ इस गल्लै गी जकीनी बनान ते दुनिया च कुसै बी मुख्य च शिक्षा बवस्था कट्टरता गी बढ़ावा नेई दे ते हर इक नागरिक लेई बरोबरी दे अधिकार मिलना सुनिश्चित होए।

<><><><><>

GoC-North Cammand Visit

सुरक्षा बवस्था गी निग्गर बनाने दे मकसद कन्नै उत्तरी कमान दे अध्यक्ष लैफ्टिनेंट जनरल एम.वी.सुचिन्द्रा कुमार होरें व्हाईट नाईट कोर दा दौरा लाइयै उंदी कारवाइएँ सरबंधी तैआरी ते मजूदा सुरक्षा चुनौतिएं दा जायजा लैता। इस दौरे कन्नै फौज गी तैआर रौहने ते तक्क रखने दी प्रणाली गी तगड़ेयाई कन्नै कायम रखने दी महत्वत्ता उजागर होंदी ऐ जेहड़ी जे क्षेत्र च चला'रदी आतंकवाद—रोधी कारवाइएँ पर मता जोर पांदी ऐ। अपने दौरे दरान सेना कमांडर होरें पक्की प्रतिबद्धता ते बहादुरी आस्तै जवानें दी सराहना कीती ते उभरदी चुनौतिएं ते खतरें थमां देश दी रक्षा करने ते आतंकवाद गी रोकने च उंदे योगदान गी अहम दस्सेआ।

<><><><><><>

Labour Commission

जम्मू कश्मीर दे लेबर कमीशनर चरणदीप सिंह होरें कल श्रम भवन च जम्मू प्रांतै दे बक्ख—बक्ख हिस्से थमां बपारमंडलें दे प्रतिनिधिएं कन्नै गल्लबात कीती जिस दरान बपार मंडलें दिएं चिंताएं गी दूर करने, संस्थान गी मजबूत बनाने लेई उंदी प्रतिक्रिया हासल करने, मंजूरे श्रमकें दे हितै च कोशता तेज करने बारे गल्लबात कीती गई। कम्म नेई करा'रदे बपार मंडलें पर प्रतिक्रिया दिंदे होई लेबर कमीशनर होरें आखेआ जे सलाना रिटर्न नेई भरने आले जां नियमें दी पालमा नेई करने आले मंडलें दे पंजीकरण रद्द कीते जांगन। उनें सब्बने बपार मंडलें गी आखेआ जे ओ अपना पूरा रिकार्ड बनाई रखन ते नियमें दी सख्ती नै पालमा करने ते समें समें पर अपने चुनां कराने बारे आयोग गी सुचित करन।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800—11—7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते

प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Weather

मौसम विभाग नै आँदे 24एं घंटे दरान किश टांवी टांवी थाहरें पर दरमयाने दर्जे दी बरखा ते बर्फबारी दे असार दस्से न। जम्मू प्रांतै दे पुंछ जिले च अज्ज बडलै हल्की बरखा दे बाद लोकें गी खुशक मौसम थमां राहत थोई ऐ ते करसान चेचे तौरा पर एहदे पर संदोख प्रगट कीता ऐ ते इस बरखा कन्नै उंदे राई—बाई दे कम्में च मदद थोग। जम्मू पुंछ सड़क पिछले हफ्ते किश चिरे लेई बंद रौहने परैंत हुन गडिडएं दी आओजाई लेई खुल्ली दी ऐ जिसलै जे मुगल रोड अजें बी बंद।

<><><><><><>

WPL

अज्ज महिला प्रीमियर लीग दा फाइनल मकाबला ऐ जेहदे च मुंबई इंडियन्स ते दिल्ली कैपिटल्स दियां टीमां आमने सामने होंगन। एह मैच मुंबई दे ब्रैबर्न स्टेडियम च संजा साढ़े 7 बजे शुरू होग। मैग लैनिंग दी अगुवाई च दिल्ली कैपिटल्स दी स्थिति मती मजबूत ऐ की जे उन्ने इस लीग च खेड़डे गेदे 8एं मैचें चा 5एं च जित्त हासल करियै सिद्धे फाइनल च थाहर हासल कीती दी ऐ जेहदे चलदे टीम दा आत्म विश्वास बी शानदार ऐ।

<><><><><><>

World Consumer Day

अज्ज विश्व उपभोक्ता अधिकार दिवस ऐ। हर बर्रे 15 मार्च गी एह ध्याड़ा, कुसै बी उत्पाद, माल समेयान जां सेवा दा इस्तेमाल करने आले उपभोक्ताएं दे अधिकारें ते उंदी राखी बारे जागरूकता फैलाने लेई मनाया जंदा ऐ। एह ध्याड़ा सब्बने उपभोक्ताएं दे बुनियादी अधिकारें गी बढ़ावा देने ते उंदे अधिकारें दा सम्मान ते संरक्षण करने गी बढ़ावा देने दा बी मौका ऐ। इस बर्रे लेई उपभोक्ता अधिकार दिवस इा विषय सार ऐ “सतत जीवन शैली लेई टिकाऊ बदलाव”।